

Ilisimatusarfimmi Ilinniartitsisunut, Perorsaasunut aammalu Isumaginninnermut Siunnersortinut ataatsimut kandidatinnorniarfissamik Naalakkersuisut pilersitseqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Najaaraq Møller, Siumut)

Akissuteqaat

(Meeqqanut, Inuusuttunut, Ilinniartitaanermut, Kultureqarnernut, Timersornermut Ilageeqarnermullu Naalakkersuisoq)

Aappassaaneerinnineq

Naalakkersuisut Ataatsimiititaliamut qujassuteqarusupput, ataatsimiititaliami peqqissaartumik suliamut isumaliutissiissummullu suliamut. Ataatsimiititaliaq allannguutissatut siunnersuummini siullermeerneranut allannguutissatut siunnersuummik Naalakkersuisut saqqummiussaannit, kiisalu paasissutissiilluni ataatsimiinnermit siunersiuinermilu aamma paasissutissanik tunngaveqartoq, Naalakkersuisut maluginiarpaat.

Ilinniarnermik sapinngisamik pitsaanerpaamik pilersitsinissaq Naalakkersuisut sulissutiginiarpaat, aamma kommuninik kiisalu ilinniagaqalertussanik ilinniagaq pillugu qanimut oqaloqatiginnissamaarput. Ilinniarfik najornagu ilinniartitsineq pillugu sulisoqarnissaanik Ataatsimiititaliap immikkut kissaateqarnera Naalakkersuisut maluginiarpaat.

Naalakkersuisut nuannaarutigalugu maluginiarpaat, ataatsimiititaliap allannguutitassatut siunnersuutaanni suleqatigiissitap innersuussutai tusaaniarneqarsimmata. Naalakkersuisulli isumaqarput, suleqatigiissitap innersuussutai utaqqineqartariaqartut, soorlu aningaasaliissutinut tunngatillugu, ilinniagaq piviusunnornissaanut aalajangiisoqassanersoq. Naalakkersuisulli isumaqarputtaaq, ilinniakkap piviusunnornissaanut misissuinermi suleqatigiissitap misissuinissaa pisariaqartoq.

Naalakkersuisut kissaatigaat allannguutissasut siunnersuut inassutigaat akuersissutigineqassasorlu inassutigalugu:

Ilinniartitsisunut, Perorsaasunut aammalu Isumaginninnermut Siunnersortinut ataatsimut kandidatinnorniarfissamik Naalakkersuisut periarfissanik misissuinissaminnut peqquneqarnissaannik Inatsisartut aalajangiiffigisassaattut siunnersuut, tassani suleqatigiissitap Naalakkersuisunit pilersinneqartup inassuteqaatai aallaavigineqassallutik, alimmasissumit ilinniartitsinissamut periarfissat ilanngullugit.